



PATNUBAY SA MISA



13 Mayo 2018

Dakilang Kapistahan ng Pag-akyat sa Langit ng Panginoon

Taon B

IKA-52 LINGGO NG KOMUNIKASYONG PANDAIGDIG

ARAW NG MGA INA

Naatasang Magtatag ng Kaharian ng Diyos

Ang pag-akyat ni Hesus sa langit ay siyang sukduhan ng kanyang kaluwalhatian, ngunit di naman nangangahulugang pinutol na niya ang kanyang pakikipag-ugnayan sa atin. Ibig lamang sabihing habang siya pa rin ang dakilang “protagonista” sa kasaysayan ng kaligtasan, pansamantala niyang ipinagpaparaya sa ibang bumubuo sa Simbahan ang matamang paglahok sa pagtatatag ng Kaharian ng Diyos.

Lahat tayo’y kasali sa ganitong dakilang pagsisikap na siyang ubod ng plano ng Diyos para sa sangkatauhan. Tumutulong tayo rito sa pagpapahayag ng Ebanghelyo at sa pamumuhay bilang mga tunay na Kristiyano.

Ngayo’y ipinagdiriwang din natin ang ika-52 Linggo ng Komunikasyong Pandaigdig, ipagdasal natin ang lahat ng mga “media practitioners,” gayundin ang lahat ng nakikinabang sa kanilang paglilingkod.

Ito din ay isang magandang pagkakataon upang ipakita natin ang pagmamahal at utang na loob sa ating mga ina, sa pagdiriwang natin ng Araw ng mga Ina. Maaari natin itong patunayan di lamang sa paghahandog sa kanila ng mga bulaklak at paggiliw, kundi sa pamamagitan din ng pagdarasal para sa kanila, lalo na sa ating pagdiriwang ng Eukaristiya ngayon.



PASIMULA



Pambungad

(Ipahahayag lamang kung walang awiting nakahanda.)

Taga-Galileang tanan, ang iyong pinagmamasdang umakyat sa kalangitan ay magbabalik din naman. Aleluya, s’ya’y awitan!

Pagbati

P–Pagpalain nawa si Hesus, ang dakila nating Panginoong naluluklok sa kanan ng Ama. Ang kanyang biyaya at kapayapaan ay sumainyong lahat!

B–At sumaiyo rin!

Pagsisisi

P–Sa paghahanda nating ipagdiriwang ang pag-akyat sa langit

ni Kristong Nabuhay, pagnilayan natin ang nakahahadlang sa paglago ng ating buhay espirituwal. (Manahimik saglit.)

P–Itinataas ka sa kanan ng Ama. Panginoon, kaawaan mo kami!

B–Panginoon, kaawaan mo kami!

P–Ikaw ang pag-asa ng lahat ng nabubuhay at mga yumao. Kristo, kaawaan mo kami!

B–Kristo, kaawaan mo kami!

P–Sinugo mo ang iyong mga apostol para ipangaral ang Mabuting Balita sa lahat ng bansa. Panginoon, kaawaan mo kami!

B–Panginoon, kaawaan mo kami!

P–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B–Amen!

Papuri

B–Papuri sa Diyos sa kaitaan sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataastaasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, gawin mong kami ay magkaroon ng banal na kagalakan at makapagdiwang nang may utang na loob sapagkat ang iyong Anak na aming Manunubos ay siyang tagapaghanda ng aming pananahanan na kanyang pinanggalingan upang kami’y panguluhan at kanyang tinunguhan upang maging pag-asa kailanman ng sambayanan niyang kanya ring katawan bilang Tagapamagitan kasama ng Espiritu Santo magpasawalang hanggan. *B*—Amen!

PAGPAPAHAYAG NG SALITA NG DIYOS



Unang Pagbasa Gw 1:1-11

Nagsisimula ang Aklat ng mga Gawa kung saan nagtatapos ang mga Ebanghelyo nina Marcos at Lucas: sa pag-akyat ni Hesus sa langit. Ipinangako niya sa kanila ang pagdating ng Espiritu Santo at ang misyon nilang magpatotoo sa kanya hanggang sa dulo ng daigdig.

L—Pagpapahayag mula sa mga Gawa ng mga Apostol

Mahal na Teofilo: Isinalaysay ko sa aking unang aklat ang lahat ng ginawa at itinuro ni Hesus buhat sa pasimula hanggang sa araw na siya’y umakyat sa langit. Bago siya umakyat, tinagubilinan niya, sa pamamagitan ng Espiritu Santo, ang mga apostol na kanyang hinirang. Pagkatapos ng kanyang pagbabata, maraming ulit siyang napakita sa kanila. Sa gayon, napatunayang siya’y buhay. Napakita siya sa kanila sa loob ng apatnapung araw at nagturo tungkol sa paghahari ng Diyos.

At samantalang siya’y kasama-sama pa nila, kanyang tinagubilinan sila: “Huwag muna kayong aalis sa Jerusalem. Hintayin ninyo roon ang ipinangako ng Ama na sinabi ko na sa inyo. Nagbinyag nga sa tubig si Juan, ngunit di na magtatagal at bibinyagan kayo sa Espiritu Santo.”

Kaya’t nang magkasama-sama si Hesus at ang mga alagad, nagtanong ang mga ito, “Panginoon, itatatag na ba ninyong muli ang kaharian ng Israel?” Sumagot siya, “Ang mga panahon at sandali ay itinakda ng Ama sa kanyang sariling kapangyarihan, at hindi na kailangan pang malaman ninyo kung kailan iyon. Ngunit bibigyan kayo ng kapangyarihan pagbaba sa inyo ng

Espiritu Santo, at kayo’y magiging mga saksi ko sa Jerusalem, sa buong Judea at Samaria, at hanggang sa dulo ng daigdig.”

Pagkasabi nito, siya’y iniakyat sa langit samantalang nakatingin sila sa kanya; at natakpan siya ng ulap. Habang sila’y nakatitig sa langit, dalawang lalaking nakaputi ang biglang tumayo sa tabi nila. “Mga taga-Galilea,” sabi nila, “bakit kayo narito’t nakatingala sa langit? Itong si Hesus na umakyat sa langit ay magbabalik tulad ng nakita ninyong pag-akyat niya.”

Ang Salita ng Diyos!
B—Salamat sa Diyos!

Salmong Tugunan Awit 46

B—Habang umaakyat ang D’yos, ang tambuli’y tumutunog!

R. M. Velez



Ha-bang u--maakyat ang D’yos,



ang tambu--li’y tumu--tu---nog!

* Magdiwang ang lahat ng mga nilikha, pumalakpak kayong may awit at tuwa! Bilang pagpupuri sa Diyos na Dakila! Ang Diyos na Poon, Kataas-taasan, ay dakilang haring dapat katakutan. Siya’y naghahari sa sangkatauhan. *B*.

* Umakyat sa trono ang Panginoong Diyos, hatid ng tambuling malakas ang tunog; masayang sigawan ang ipinansuob. Purihin ang Diyos, siya ay awitan, awitan ang hari, siya’y papurihan! *B*.

* Ang Diyos, siyang hari ng lahat ng bansa, awita’t purihin ng mga nilikha! Maghahari siya sa lahat ng bansa, magmula sa tronong banal at dakila. *B*.

Ikalawang Pagbasa Ef 1:17-23

Narito ang isang napakagan-dang pagsusumamo at pagninilay sa pagtataas kay Kristo nang higit sa ano mang kapangyarihan.

L—Pagpapahayag mula sa Sulat ni Apostol San Pablo sa mga taga-Efeso

Mga kapatid:
Hinihiling ko sa Diyos ng ating Panginoong Hesukristo, ang dakilang Ama, na pagkalooban niya kayo ng espiritu ng karunungan at ng tunay

na pagkakilala sa kanya. Nawa’y liwanagan ng Diyos ang inyong mga isip upang malaman ninyo ang ating inaasahan sa kanyang pagkatawag sa atin. Ito’y ang kaluwalhatiang inilaan niya sa kanyang mga hinirang, at ang walang hanggang kapangyarihan niya sa atin na mga nananalig sa kanya.

Ang kapangyarihan ding iyon ang muling bumuhay kay Kristo at nagluklok sa kanya sa kalangitan, sa kanan ng Diyos. Kaya’t nasa ilalim ng kapangyarihan ni Kristo ang lahat ng paghahari, kapamahalaan, kapangyarihan, at pamunuan. Higit ang kanyang pangalan kaysa lahat ng pangalan, hindi lamang sa panahong ito kundi pati sa darating. Ipinailalim ng Diyos sa kapangyarihan ni Kristo ang lahat ng bagay, at siya ang ginawang ulo ng Simbahan. Ito ang katawan ni Kristo, ang kapuspusan niya na pumupuspos sa lahat-lahat.

Ang Salita ng Diyos!
B—Salamat sa Diyos!

Aleluya Mt 28:19a.20b

B—Aleluya! Aleluya!

Humayo’t magturo kayo palaging kasama ako hanggang sa wakas ng mundo.
Aleluya! Aleluya!

Mabuting Balita Mc 16:15-20

Sa salaysay tungkol sa pag-akyat ni Hesus sa langit nagtatapos ang kanyang pagpapakita sa kanyang mga disipulo. Gayundin, pambungad ito sa “Panahon ng Simbahan” na siyang tuwirang karugtong ng mapangaral at mapagligtas na misyon ni Kristo.

P—Ang Mabuting Balita ng Panginoon ayon kay San Marcos
B—Papuri sa iyo, Panginoon!

Noong panahong iyon: Napakita si Hesus sa Labing-isa at sinabi sa kanila, “Humayo kayo sa buong sanlibutan at ipangaral ninyo sa lahat ang Mabuting Balita. Ang sumampalataya at mabinyagan ay maliligtas, ngunit ang hindi sumampalataya ay parurusahan.

Ang mga sumasampalataya ay magtataglay ng ganitong tanda ng kapangyarihan: sa pangalan ko’y magpapalayas sila ng mga demonyo at magsasalita ng ibang wika; sila’y hindi maaano, dumampot man ng ahas o uminom ng lason; at gagaling ang mga maysakit na mapatungan ng kanilang mga kamay.”

Pagkatapos magsalita sa kanila, ang Panginoong Hesus ay iniakyat sa langit, at lumuklok sa kanan ng Diyos.

Humayo nga ang mga alagad at nangaral sa lahat ng dako. Tinulungan sila ng Panginoon sa gawaing ito. Pinatotohanan niya ang Salitang kanilang ipinangangaral sa pamamagitan ng kapangyarihang gumawa ng himala, na ipinagkaloob niya sa kanila.

Ang Mabuting Balita ng Panginoon!

B—Pinupuri ka namin, Panginoong Hesukristo!

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Ipinagugunita sa atin ng Pagakyat ng ating Panginoon ang ating pangwakas na kapalaran. Ipinaaalaala rin nito ang ating tungkuling magsikap para sa pagtatatag ng Kaharian ng Diyos sa lupa sa pamamagitan ng tapat na Kristiyanong pamumuhay. Nakababatid sa lahat nating kahinaan, manalangin tayo:

B—Panginoon, dinggin mo kami!

* Para sa Simbahan at mga namumuno rito: Nawa maging tapat sila sa pagtupad sa kanilang misyong akayin ang sangkatauhan sa patuloy na moral at espirituwal na pagsulong. Manalangin tayo!

B.

* Para sa mga naakit sa makamundong pagpapahalaga hanggang sa sila'y makalimot sa mga pagpapahalagang makalangit: Nawa maganyak sila ng ating mabuting halimbawa upang itaas nila ang kanilang mga hangarin. Manalangin tayo!

B.

* Para sa mga nagpakababa-baba sa pagkakasala: Nawa dinggin nila ang panawagan ni Kristong umaakyat sa langit para sa isang tapat na pagbabalik-loob at pagpupunyagi sa mabuting gawa. Manalangin tayo!

B.

* Para sa lahat ng mga *media practitioners* at lahat ng mga nasa daigdig ng komunikasyong panlipunan: Nawa makatulong sila sa kanilang propesyon para sa ikaangat ng lahat ng tao at para sa pagtataguyod ng kapayapaan at katarungan sa buong daigdig. Manalangin tayo!

B.

* Para sa lahat ng ina sa buong mundo: Nawa sila ay maging malakas at malusog para makatupad sa kanilang mga tungkulin nang may pagmamahal at katapatan. Manalangin tayo!

B.

* Tahimik nating ipanalangin ang ating mga pansariling kahalilingan. (*Tumigil saglit.*)

Manalangin tayo!

B.

P—Panginoong Hesus, ituon mo ang aming mga puso sa “dakilang pag-asa” na ipinananawagan mo sa amin. Pagsikapan nawa naming maitatag dito sa lupa ang Kaharian ng katarungan, kapayapaan, at pagmamahal na ipinarito mo para itatag, at kung saan ka nabubuhay at naghahari magpakailanman.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, pa-

kundangan sa pag-akyat ng Anak mong mahal ginaganap namin ang paghahain nang may kapakumbabaan at ipagkaloob mong sa ganitong pagpapalitan ng mga kaloob mo at ng aming mga alay kami ay makasalo sa pagkabuhay at pag-akyat sa kalangitan sa pamamagitan ni Hesukristo kasama ng Espiritu Santo magpasawalang hanggan. **B—Amen!**

Prepasyo ng Pag-akyat sa Langit I

P—Ama naming makapangyarihan, tunay ngang marapat na ikaw ay aming pasalamatan.

Kasama't kamatayan matapos na lupigin ng Anak mong si Hesus na Panginoon namin, siya ngayo'y umakyat sa iyong piling bilang Haring dakilang sinasamba ng mga anghel. Siya ang aming tagapamagitan nakikiusap sa iyo para sa tanan. Siya ang tagapasya sa lupa't kalangitan. Hindi niya iwinaksi ang aba naming pagkatao sa pagluklok sa kanan mo. Sapagkat kami ang katawan at siya ang ulo, ang pag-akyat niya'y katiyakang sasapit kami sa iyo.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B— Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Palaging kasama ako, palaging kapiling ninyo hanggang sa wakas ng mundo, ang sabi ni Hesukristo. Aleluya, awit sa'yo!

Panalangin Pagkapakinabang

P—Ama naming mapagmahal, pinagkakalooban mo kami ng pagkakataon na akuin sa lupa ang ginagawa mo at nilalayan. Gawin mong ang loobin namin ay matuon sa iyong pinaglululukan sa Anak mo ngayon upang kaparis naming tao sa piling mo siya'y mamagitan kasama ng Espiritu Santo magpasawalang hanggan.

B —Amen!

PAGWAWAKAS



P—Sumainyo ang Panginoon.

B —At sumaiyo rin!

P—Magsiyuko kayo at ipanalangin ang pagpapala ng Diyos. *(Manahimik saglit.)*

Naniniwala kayong naluluklok si Hesus sa kanan ng Ama. Magalak nawa kayong siya ay kasama rin ninyo hanggang sa wakas ng panahon.

B —Amen!

P—Lingapin nawa kayo ng Diyos nang buong paggiliw ngayong pag-akyat sa langit ng Kanyang bugtong na Anak upang ipaghandanda kayo ng lugar doon.

B —Amen!

P—Tibayan nawa kayo ng biyaya ng Diyos sa pagtupad ninyo sa pagiging mga sugo at saksi ng Ebanghelyo.

B —Amen!

P—Pagpalain kayo ng makapangyarihang Diyos: Ama, Anak, at Espiritu Santo.

B —Amen!

P—Humayo kayo sa kapayapaan ni Kristong niluwalhati.

B —Salamat sa Diyos!

Mga Tagapaghatid ng Ebanghelyo at mga Saksi Rito

Sinimulan ng Pag-akyat ng Ating Panginoon ang panahon ng Simbahan – ang panahon ng panawagan para sa pagbabalik-loob ng lahat ng tao sa pamamagitan ng paos na tinig ng mga taong mahihina't makasalan. Sa mga pamantayang pantao, ang kanilang pangangaral ay panandaliang pagtatangkang malamang mabigo sa simula pa lamang. Gayunman, pagkalipas ng halos 2,000 taon at milyun-milyong balakid, patuloy pa rin ang pangangaral na naging lalo pang matapang.

Ang sanhi nito? Patuloy sa pagtupad si Kristo sa pangako niya sa kanyang mga alagad: “Ako’y laging kasama ninyo hanggang sa katapusan ng sanlibutan” (Mt 28:20). Nananatili siya sa kanyang Simbahan. Nananatili siya sa Salitang iniingatan, ipinahahayag, at pinatotohanan ng Simbahan.

Salamat sa tuwinang pananatili ni Kristong Nabuhay, ang kanyang Salita ay nagpapakitang ito ay laging sariwa maging sa kasalukuyan at sa lahat ng henerasyon, at nagtataglay ng kayamanang ikinapagiging angkop pa rin sa lahat ng kultura't kundisyon.

Ang puso ng Salitang ipinahahayag ng Simbahan ay ang EBANGHELYO, ang MABUTING BALITA na ipinagkasundo ng Diyos ang lahat ng tao sa Kanya kay Hesukristo (*sangguniin Ro 5:10-11*), nagparangal kay Hesus nang higit sa lahat ng nilalang sa pamamagitan ng pagluluklok sa kanya sa kanan ng Ama (*sangguniin Mc 16:19*), at nagbigay sa kanya ng pangalang higit sa lahat ng pangalan. (*Sangguniin Fil 2:9*.)

Ang “Mabuting Balita” ay di lamang tungkol sa pagluluwalhati kay Kristo. Ito ay tungkol din sa mapagligtas na bisa nito sa lahat ng lalaki't babae ng lahat ng panahon at lugar. Sa ganitong paraan, ang kadakilaan ng muling pagkabuhay ni Hesus at ang pagtubos sa sangkatauhan ay ipinahahayag di bilang balita buhat sa malayong nakaraan, kundi isang mapagligtas na katunayang nakaugat sa kasaysayan at umaabot sa kawalang hanggan. Personal na malalaspang ng lahat ang gayong pagpapala sa pamamagitan ng tugong pananampalataya sa pagpapahayag ng “Mabuting Balita.”

At, ngayong tayo ay nakalaspang nito sa ating buhay, tayo ay inaasahang magpahayag nito sa iba at magpatotoo sa Mabuting Balita ng Ebanghelyo sa pamamagitan ng pamumuhay na tinatampukan ng hinahon, pagkabukas-palad, katahimikan, at lahat ng iba pang katangiang ikinapagiging munting langit ng ating kapaligiran. Sa gayon, sa mundong tuwina'y pinalulungkot ng sari-saring masasamang balita, ang pagpapahayag ng “Mabuting Balita” ni Hesukristo ay nananatiling bukal ng puspos na kagalakan para sa lahat. Tulad ito ng isang maliwanag na sulong itinataas ng Simbahan sa madilim na gabi ng isang mundong nasa ilalim pa rin ng gayuma ni Satanas, ngunit nakalaang sa wakas ay malulupig ni Kristo at iharap niya sa Ama. (*Sangguniin 1 Cor 15:24*.)



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • **Telefax:** 894-5241 • **Website:** www.wordandlife.org

• **E-mail:** marketing@wordandlife.org; wordandlifepublications@gmail.com • **FB:** Word & Life Publications

• **Editorial Team:** Fr. S. Putzu, C. Valmonte, G. Ramos, V. David, J. Domingo, A. Adsuara, D. Daguio

• **Illustrations:** A. Sarmiento, B. Cleofe • **Marketing:** Fr. B. Nolasco and T. Mojica • **Circulation:** R. Saldua